

QADIMGI DAVR VA O'RTA ASR MADANIYATIDA MUTOLAA SOTSIOMODELINING TRANSFORMATSIYASI



Oygul DULANBAYEVA,

O'zbekiston Milliy universiteti

*“Sotsiologiya” kafedrası katta o'qituvchisi,
sotsiologiya fanlari bo'yicha falsafa doktori
(PhD)*

Annotatsiya. Mazkur maqolada, qadimgi Sharq va G'arb madaniyatlarida mutolaaga bo'lgan munosabat, faylasuflarning matnlarni o'qish, talqin qilish, tushunish haqidagi qarashlari tahlil qilinadi. Har bir tarixiy davrdagi falsafiy g'oyalarning keyinchalik mutolaa madaniyatiga ta'siri o'rganiladi. Shuningdek, qadimgi davr va o'rta asrlar sotsiomadaniy muhitida mutolaaga bo'lgan munosabat komporovistik tahlil etiladi.

Kalit so'zlar: mutolaa sotsiomodeli, matn, tushunish, kitob, xos madaniyat, bilish, talqin qilish, ijtimoiy funktsiya.

Abstract. This article analyzes the attitude towards reading in ancient Eastern and Western cultures, the views of philosophers on reading, interpretation, and understanding of texts. The influence of philosophical ideas in each historical period on the subsequent culture of reading is studied. Also, the attitude towards reading in the sociocultural environment of antiquity and the Middle Ages is analyzed in a comparative manner.

KeyWords: sociomodel of reading, text, understanding, book, specific culture, knowledge, interpretation, social function.

Kirish. Insoniyat tafakkur tarixida yozuv va o'qishning yuzaga kelishi eng muhim hodisalardan biri bo'lib, u madaniyat va sivilizatsiyalarning vujudga kelishiga imkon yaratdi. Shu bois insoniyat tarixining har bir davrida mutolaaga, kitobga bo'lgan munosabat o'sha davrning ijtimoiy madaniy shart-sharoitlaridan kelib chiqib, o'zgarib bordi. Masalan, qadimgi jamiyatlarda mutolaa nafaqat olamni bilish, balki matnni muqaddaslashtirish vositasi sifatida ham qabul qilingan. Shu sababdan ushbu davrdagi faylasuflar, mutafakkirlar muayyan matnni tushunish, uni talqin qilishda o'ziga xos yondashuvlarni taklif etishadi. Kitob va kitobxonlikning inson va jamiyat hayotidagi o'rnini belgilash muammolari barcha davr mutafakkirlarining qarashlarida aks etgan bo'lib, ular o'z davrining ijtimoiy-madaniy muhitidan kelib chiqqan holda, kitob o'qishning turli jihatlariga urg'u beradilar. O'z navbatida ularning qarashlari o'sha davrdagi mutolaa sotsiomodeli, aniqroq qilib aytganda, uning jamiyat hamda alohida individ hayotidagi ahamiyatini belgilaydi.

Metodologiya. Mazkur maqolada nazariy-metodologik asos sifatida, xorijiy olimlardan A.N. Vaneyevning “Kitobxonlik madaniyati tarixi” [12; 69-79]. N.A. Stefanovskayaning “Mutolaaning ekzistensial va kommunikativ asoslari” [2], L.Gudkovning “Ziyolilik inqirozi va ommaviy mutolaa” [13; 4] kabi ishlari, shuningdek, o'zbek olimi A.A. Umarovning “Jamiyatda mutolaa madaniyatini shakllantirish va kutubxonachilik muammolari” [14; 4-10] kabi tadqiqotlaridan foydalanilgan. Qolaversa, maqolada, analiz va sintez, retrospektiv va qiyosiy tahlil singari umum ilmiy metodlar qo'llanilgan.

Mulohaza va natijalar. Mutolaaning ijtimoiy hayotdagi ahamiyati haqida ilk falsafiy qarashlar Qadimgi Xitoy va antik davr mutafakkirlari: (Konfutsiy, Lao Tsz, Chjuang Tzu, Sokrat, Platon, Seneka kabi faylasuflarning ta'limotlarida o'z ifodasini topgan. Ular mutolaani asosan ma'naviy hayotning ajralmas jihat sifatida qabul qilishgan. Misol uchun, Xitoy donishmandligida shunday deyilgan: “Kimki o'qishga mohir bo'lsa, “to'r va tuzoqlarni” tashlab ketmasdan ilm zav-

qini tatib ko‘radi”. Tafakkurga mohir bo‘lgan kishi ko‘rinadigan suratlardan yuz o‘girmasdan, qalb va ruh sirlarini ko‘radi” [1; 128] .

N.A.Stefanovskayaning fikriga ko‘ra, mutolaaning birinchi sotsiomodellari eng qadimgi Sharq jamiyatlari (Hindiston, Xitoy) sivilizatsiyasida yuzaga kelgan. Bunda, mazkur modellar faqat xos odamlar doirasi uchun mavjud bo‘lgan ma‘naviy o‘zini o‘zi takomillashtirishning elita muqaddas-meditativ amaliyoti sifatida shakllangan. Mutolaa amaliyoti tarqalishining boshidanoq uning asosiy ko‘nikmalari va savodxonlik darajasi mavjudligini nazarda tutadigan kundalik, utilitar mutolaaga tabaqalangan. Bu o‘rinda, ma‘naviy yuksaltiruvchi o‘qish to‘g‘ri deb hisoblangan va jamiyatning elita qatlamiga xos xususiyatning yetakchi tendensiyalardan biri bo‘lgan.

Qadimgi Sharq faylasuflari kitob mutolaasiga o‘ziga-xos nuqtai nazardan yondashgan. Tarixiy manbalarga ko‘ra, Konfutsiy Xitoy tarixida birinchi bo‘lib xususiy maktab ochgan. U o‘qish va yozishni, qadimiy kitoblarni, afsonalarni, G‘arbiy Chjou marosimlarini sharhlashni o‘rgatgan. Biroq, uning asosiy maqsadi shogirdlariga axloqiy meyorlarni, "olijanob odamning o‘zini o‘zi takomillashtirish" usullarini o‘rgatish edi.

Shuni nazardan chetda qoldirmaslik lozimki, Konfutsiylik avvalambor ijtimoiy axloqiy ta‘limot bo‘lib, unda kitob o‘qish masalalari jamiyatdagi axloqiy meyorlar bilan bog‘liq talqin etilgan. Misol uchun, faylasufning kitob o‘qishga bo‘lgan munosabati uning quyidagi mulohazalarida ko‘rinadi: “Bolalar oilada o‘z otasiga, onasiga, qolaversa boshqa yoshi ulug‘ qarindoshlariga hurmat ko‘rsatishlari kerak. Oiladan tashqarida boshqa odamlar ayniqsa, yoshi katta kishilarga iltifotli bo‘lishi lozim. Agar shu burchlarini bajargandan so‘ng, kuch-quvvatlari qolsa, vaqtlarini kitob o‘qishga sarflashi zarur” [1; 96].

Konfutsiy o‘qitishning muhimligini ta‘kidlab, ta‘lim va tafakkur o‘rtasidagi dialektik bog‘liqlik g‘oyasiga diqqat qaratadi. Misol uchun, faylasuf: “O‘ylamasdan o‘qish vaqtni behuda sarflashdir, “O‘ylash va o‘rganmaslik buzg‘unchidir, ya‘ni fikrlash bilan bog‘lanish zarur. O‘qigan narsasi haqida o‘ylamasdan kitob o‘qish hech qanday natija bermaydi, kitob o‘qimay o‘ylash esa faqat charchatadi” [1; 96] degan mulohazani keltiradi.

Xullas, qadimgi Xitoy falsafasida mutolaaga munosabat shaxsning ma‘naviy o‘zini o‘zi takomillashtirish, ijodiy rivojlanish yo‘li sifatida belgilanadi.

Qadimgi Hind madaniyatining “Vedalar”, “Upa-

nishadlar” kabi diniy- falsafiy kitoblarida ham mutolaaga o‘ziga xos munosabat aks etadi. Shu bilan birga, barcha sohalarda bo‘lgani kabi, mutolaa qilish jamiyatdagi ijtimoiy tabaqalanish bilan ham bog‘liq hisoblanadi. Unga ko‘ra, muqaddas “Vedalar”ni faqat oliy tabaqa ruhoniylargina o‘qib tushunadi va ularni to‘g‘ri sharhlay oladi. Muqaddas matnlarni o‘qish hayot tashvishlaridan yiroq bo‘lgan brahmanlarga xos bo‘lib, ular borliq sirlarini, inson hayoti mohiyatini boshqa quyi tabaqa vakillariga tushuntirib berishlari lozim.

Tadqiqotchi olimlar qadimgi hind jamiyatida mutolaaning quyidagi uch ko‘rinishini ajratadilar:

- 1) muqaddas matnlarni o‘qish;
- 2) marosim qo‘shiqlarini o‘qish;
- 3) davlat boshqaruviga doir hujjatlarni o‘qish.

Sanab o‘tilgan ushbu mutolaa amaliyoti qadimgi Hindistonda har qanday turdagi matnlarni o‘qish faqat yuqori tabaqa vakillariga xos bo‘lganligini ko‘rsatadi.

Qadimgi Xitoy va Hind jamiyatlaridan farqli ravishda, antik davr madaniyatida og‘zaki nutqning ustunligini kuzatish mumkin. Bu bir tomondan, Gomer, Geseot kabi shoirlarning ijodlari og‘zaki an‘anaga ko‘ra avloddan avlodga o‘tib kelgan bo‘lsa, ikkinchi tomondan, esa jamoaviy voqealar (mifologik-bayram sayillari yoki siyosiy sud muhokamalari) og‘zaki usulda keng tarqalganligi bilan izohlanadi. Masalan, Samosatalik Lusian (qadimgi yunon yozuvchisi) ning "Ko‘p kitob sotib olgan johil odam" dialogida og‘zaki nutqning ma‘nosini yaxshiroq tushunish uchun ovoz chiqarib o‘qish odati haqida (asosan tinish belgilarining yo‘qligi va, hatto, so‘zlarning ajratilmasligi tufayli) va shu bilan birga kitoblar kam bo‘lganligi sababli ustun bo‘lganligini ta‘kidlaydi [4; 544].

Pifagor va Sokrat og‘zaki nutqni suhbat va dialog shaklida o‘tkazishni afzal ko‘rdilar. Qadimgi yunon faylasufi Sokrat hech narsa yozmagan, faqat jonli nutq fikrni to‘g‘ri ifodalashi mumkin deb hisoblagan. Bu yerda biz olim sifatida faylasufning alohida intellektual tipiga duch kelamiz. S.S.Averintsevning fikricha, «Dono» tipiga mansub mutafakkir butun umrini odamlar bilan, tabiat bilan, o‘z fikrlari bilan suhbatda o‘tkazishi mumkin, juda kamdan-kam hollarda o‘ram olib, «olim» tipiga mansub bo‘lgan intellektual mehnatkash esa kitoblar bilan muntazam aloqada bo‘lishdan qochib qutula olmadi» [3; 519].

Platon bilish jarayonini og‘zaki so‘zlash, xotiralarini uyg‘otish san‘ati sifatida belgilaydi. U falsafa ta-

rixida yozish funksiyalarini juda past baholagan, uni tilning xizmat komponenti, yordamchi yodlash usuli – gipomneziya sifatida ko'rgan. Platon, Sokratdan farqli o'laroq, o'zining asosiy g'oyalarini yozma shaklda, mashhur dialoglarda – yuksak badiiy falsafiy asarlarda aks ettirgan. Shunday qilib, u "Fedr" dialogida quyidagilarni ta'kidlaydi: "Bilimli odamning jonli nutqi yozma ifodalansa, haqiqiy asarga aylanadi. Faqat, haqiqatni aks ettirgan logosgina yozma ifodalanganda o'ziga xos qiymat kasb etadi" [5; 254]. Zotan, Platon tovushli so'z, intonatsiyalangan Logosning ustuvorligini ta'kidladi.

Shu bilan birga, Platon matnlarni ikki guruhga ajratadi. Birinchi guruhga haqiqatni o'z ichiga olgan matnlar, ikkinchi guruhga esa yolg'on va shuning uchun foydasiz va hatto odamlar uchun xavfli matnlar kiradi. Bu yerda Platon bizni yolg'onning zararli ekanligi haqidagi fikrga olib keladi, chunki "u mavjud bo'lmagan narsa haqida go'yo mavjud bo'lgandek gapiradi" [5; 120]. Soxta matnlar, ma'lum ma'noda, qalbimizda paydo bo'ladigan yolg'on hissiyotlarni amalga oshiradi. Aynan shuning uchun ham Platon sofistlar faoliyati haqida: mazmunni hisobga olmasdan, nutq san'atining rasmiy qoidalarini o'rgatadi va shu bilan shaklan to'g'ri, lekin mazmunan noto'g'ri matnlarni yaratishga yordam beradi, deya keskin salbiy gapiradi.

Yana bir antik davr faylasufi Aristotelning fikricha, nutq bevosita tafakkur g'oyalarini yetkazadi; yozuv faqat nutqda, ovozda mavjud bo'lgan narsalarni ifodalaydi. Platon kabi Aristotel ham og'zaki nutqni aqlga yaqinroq deb hisoblagan. Fransuz faylasufi Derrida ta'biri bilan aytganda, "Aristotel uchun og'zaki so'zlar aqliy tajribaning timsoli bo'lsa, yozma belgilar faqat og'zaki so'zlarning ramzidir" [6].

Rim faylasufi, Seneka O'zining "Lusiliyga axloqiy maktublar" asarida kitoblarni tanlab o'qish fazilati haqida so'z yuritadi: "Haddan ortiq ko'p kitob o'qish ham inson aqlini chalg'itadi. Agar shaxsiy kutubxonangizdagi barcha kitoblarni o'qiy olmasangiz, o'zingizdan aqlli odamlar muhim deb belgilagan matnlar bilan kifoyalaning. Biroq, ba'zan men bu kitobni ham, boshqasini ham ochib ko'rmoqchiman, deb qaysarlik qilishingiz mumkin. Lekin, ko'p taomlarni tatib ko'rish, to'qlik belgisi bo'lgani kabi, haddan ziyod ovqatlanish ham oshqozonni buzadi. Xuddi shunday tanlashni bilmay ko'p o'qish ham kishining aqlini chalg'itadi" [7; 96].

Seneka mutolaa qilish jarayonida kerakli mulohazalarni qayd etib borish ko'nikmasini shakllantirish-

ga ham urg'u beradi. "Agar biror narsani o'qisang, o'qiganingdan asosiy fikrni o'rgan. Men ham shunday qilaman: o'qiganimdan, albatta, bir narsani qayd etaman, qalam bilan o'qish orqali ilg'ab olingan narsa aql ko'zgusiga o'yib chizilgan naqshga aylanadi" [7; 96].

Stoiklarning g'oyalarini targ'ib qilgan yana bir Rim faylasufi Epiktet hisoblanadi. Epiktet ta'limotining asosiy ma'nosi ezgulik tushunchasi bilan bog'liq bo'lib, o'qishning inson hayotidagi ahamiyati haqida o'z fikriga ega edi. Agar siz kitob o'qish yoki insonga yaxshilik qilish o'rtasida tanlov qilsangiz, ikkinchisi ustun bo'lishi kerak: "Kitob o'qish amal emas, balki amalga tayyorgarlikdir. Insonga qandaydir yordam berish imkoniyati tug'ilsa, o'ylamasdan, hatto eng yaxshi va foydali kitobni ham o'qishni kechiktirish kerak". Kitob o'qish insoning faqat o'zi uchun bo'lmasligi kerak, chunki u behuda narsalarni o'zlashtirishimiz uchun emas, balki o'qib o'rganganlarimizni hayotda qo'llay olish hamda yaxshi yashashni bilish uchun bo'lishi lozim. Agar doimiy mutolaa qilsak, boshqalarning bunga to'sqinlik qilishidan bezovta bo'lmaymiz. Bu esa, kitob o'qish uchun muhim sabab bo'la oladi" [8;].

Qisqasi, qadimgi yunon jamiyatida ijtimoiy-madaniy vaziyat, o'ziga xos ratsional tafakkur tarzi yozma nutqqa nisbatan salbiy munosabatni shakllantirdi. Bu o'z navbatida notiqlik san'atining yuksak darajada rivojlanishiga, falsafiy ta'limotlar ham og'zaki suhbatlar tarzida olib borilishiga zamin yaratdi.

O'rta asr falsafasi (xristian apologetikasi), antik davrdan farqli o'laroq, o'ziga xos xususiyatlari bilan tavsiflanadi. Bularni quyidagicha ifodalash mumkin:

- 1) jahon dinlari xususan, xristianlik va islom dinlaridagi muqaddas kitoblarning mavjudligida;
- 2) kitob o'qish matn orqali ilohiy borliq bilan muloqot qilish vositasi sifatida qabul qilinadi;
- 3) so'z "ilohiy vahiyni" tushunishning universal usuli sifatida talqin etiladi.

Xristianlik va islom dini qadriyatlariga ko'ra, har bir tabiat hodisasi xudoning qo'li bilan yaratilgan va insonga o'qish uchun berilgan matndir. Shunday qilib, muqaddas kitoblarni o'qiyotgan odam o'qishning o'zidayoq ilohiy borliq bilan muloqot qiladi va unga o'xshash mazmun kasb etadi. Xristian madaniyati Injildagi payg'ambarlar tomonidan qayd etilgan Xudo Kalomiga sig'inish bilan tavsiflanadi. "Hayot kitobi" g'oyasi yozilgan imonlilarning qalbida kuylangan,

Muqaddas Kitobning muqaddas matni, cherkov otalari (ruhoniylar)ning matnlari va va'zlarida barcha nasroniy ta'limotiga singib ketgan. Shuning uchun germevika – matnlarni talqin qilish san'ati o'rta asrlar madaniyatining o'zagiga aylanadi. Xristianlikda butun dunyo, jumladan, tabiat Xudoning Kalomi bilan bog'liq holda ikkinchi o'rinda turadi.

O'rta asrlarning oxiriga kelib, kitob va o'qishga bo'lgan munosabatning uchta asosiy yo'nalishi paydo bo'ldi:

1. "Muqaddaslik" tushunchasini ustun biluvchi va ilohiy matnlarni tushunishga qaratilgan mutolaa.

2. Muqaddas kitoblarni sharhlashga qaratilgan mutolaa.

3. Matnga nisbatan muqaddas munosabatning yashirin muqobili sifatida dunyoviy mazmundagi kitoblarning mutolaasi.

Masalan, o'rta asr falsafasining eng yirik vakili Avgust Stine e'tiqod va aqlning uyg'unligi haqidagi nazariyani ishlab chiqadi. U mazkur munosabatda dinga nisbatan e'tiqodni tan olish talabini ilgari suradi. Unga ko'ra, konseptual-ratsional (mantiqiy fikrlash, fan va falsafa yutuqlari) va irratsional (cherkovning "Muqaddas Yozuvi" nufuzi) o'zaro uyg'un bo'lgandagina haqiqat yuzaga chiqadi. Avgustinning quyidagi iqtibosida buni kuzatish mumkin: "Mutolaa qilayotganimizda haqiqatni tashqi ko'rinishdagi so'zlardan emas, balki ana shu so'zlar yashirgan ma'nodan izlash kerak" [11]

Yana bir xristian apologeti P. Abelyar ham mutolaa qilishda aql va e'tiqodning o'zaro qarama-qarshiligiga diqqat qaratadi. Uning fikriga ko'ra, faqat aqlning o'zi bilan ilohiy haqiqatni bilib bo'lmaydi. Shu bois ham xudo insonga e'tiqod qilish uchun qalb, hissiyot kabi latif narsalarni bergan. Inson bundan xulosa chiqarib yashashi, aql yuritishi kerak [9; 794 – 809.].

Umuman olganda, o'rta asrlar tafakkur tarzida mutolaa qilish xudoni anglash, unga e'tiqod qilish vositasi sifatida talqin etiladi. Bu ma'noda kitob "Xudo kalomi"ning timsoliga aylanadi, uni o'qish yashirin, transsendental sirga kirishning o'ziga xos ifodasi sifatida namoyon bo'ladi.

Xulosa. Yuqorida keltirilgan mulohazalar tahlilini umumlashtirgan holda aytish mumkinki, insoniyat tafakkur tarixining turli bosqichlarida mutolaaning ijtimoiy funksiyalari, turlari aniqrog'i uning sotsiomodeli o'zgarib borgan. Qadimgi davr jamiyatlarida u elitar, xos tabaqalar uchun o'ziga-xos faoliyat turi bo'lsa, o'rta asrlarga kelib, uning ahamiyati diniy mazmun

kasb etgan. Qolaversa, turli davr va madaniyatlardagi, dunyoqarashning, ijtimoiy munosabatlarning, ma'naviyat hamda qadriyat yo'nalishlarining o'zgarishi mutolaaning funksiyalari, mazmuni, ko'laming transformatsiyalashuviga sabab bo'ladi.

Foydalanilgan adabiyotlar ro'yxati:

1. Конфуций. Лунь Ю. Древняя китайская философия. Сборник текстов: в 2-х томах. Москва: Мысль, 1972.

2. Стефановская Н. А. Экзистенциальные и коммуникативные основания чтения: теория, методология и методы социологического исследования: автореф. ... Доктор социологических наук. Тамбов, 2009. 41 с.

3. Шендрик А.И. Теория культуры: Учебное пособие для вузов. – Москва: ЮНИТИ-ДАНА, Единство, 2002. – 519 с.

4. Лукиан. Сочинения: в 2-х томах. СПб.: Алетей, 2001. т. 1. 2. 544 с.

5. Платон. Федон, Байрам, Федр. СПб.: Азбука, 1997. 254 с.

6. Постмодернизм. Энциклопедия / сост. и научный. ред. А. А. Грицанов, М. А. Можейко. Минск: 2001. 1040 с.

7. Сенека Луций. Нравственные письма к Луцилию. URL: <http://jourfac.narod.ru/zip/9ftSeneca.zip> (дата доступа: 07.06.2024).

8. Эпиктет. В чем наше благо? Избранные мысли римского мудреца. URL-адрес: <http://www.sky-art.com/epictet/blago/blago00.htm> (дата доступа: 19.04.2024).

9. Абельяр П. Возражение одному невежде в области диалектики // Антология мировой филологии. София: в 4-х томах. Москва: Мысль, 1969–1973. Том. 1. С. 794–809.

10. Веринцев С. С. Слово и книга // Поэтика ранневизантийской литературы. Москва: Код, 1997.

11. Ванеев А.Н. Проблемы философии библиотеки/Ванеев А.Н. Книга: Исследования и материалы. – Москва, 2000.– С.69-79.

12. Гудков Л. Кризис интеллигенции и массовое чтение /Библиотека. – 2012. – №11. – С.4.

13. Умаров А.А. Жамиятда мутолаа маданиятини шакллантириш ва кутубхоначилик муаммолари // "Фан, таълим маданият ва бизнес соҳаларида интернет ва кутубхона-ахборот ресурсларидан фойдаланиш. Учинчи халқаро конференция материаллари. – Тошкент – Самарқанд, 2004. – Б. 4–10.

